



## INTRODUCZIUN

DA SUR MARTIN BEARTH

*Gion Battesta numna Jesus il «tschut da Diu». Quei regorda nus al tschut en l'Egipta che veva spindrau cun siu saung ils Israelits dalla mort e dalla sclavaria. E mellis tschuts vegnevan era unfri onn per onn a Jerusalem per engraziar a Diu e rugar el per sia benedicziun e protecziun.*

*Ussa ei Jesus il tschut da Diu che unfrescha sia veta per nies spindrament e pil spindrament dall'entira scaffiziun. Ils dus frars, Andriu e Simon, suondan Jesus. Sto esser ch'els fuvan carstgauns ch'encurevan, che vevan in cor malruasseivel, sco sogn Augustin di, plein desideri per Diu. Cun ils plaid: «Nus vein anflau il Messias», envida Andriu siu frar Simon da vegnir cun el e semetter sin via cun Jesus.*

*Muossa Andriu buc era a nus a moda impressiunonta, co era nus duessen envidar in l'auter silla via cun Jesus? Era la cardientscha ei in viadi e drova il concarstgaun.*

## EVANGELI

*Gn 1,35–42*

<sup>35</sup>Il di sissu steva Gion puspei leu cun dus da ses giuvnals. <sup>36</sup>Mond Jesus sperasvi, ha Gion drizzau sia egliada sin el e detg: Mirei, il Tschut da Diu! <sup>37</sup>Ils dus giuvnals han udiu siu plaid ed ein suandai Jesus.

<sup>38</sup>Mo Jesus ei seviults e vesend ch'els suandavan el, ha el emparau: Tgei encuris? Els han rispundiu: Rabbi – quei vul dir Mussader – nua stas ti? <sup>39</sup>El ha dau per risposta: Vegni e mirei! Els ein i cun el ed han viu, nua ch'el steva ed ein restai cun el quei di. Ei fuva entuorn la dieschavla ura.

<sup>40</sup>Andriu, il frar da Simon Pieder, fuva in da quels dus che vevan udiu il plaid da Gion ed eran suandai Jesus. <sup>41</sup>Quel ha entupau igl emprem siu frar Simon ed ha detg ad el: Nus vein anflau il Messias – quei vul dir igl Unschiu. Ed el ha menau Simon tier Jesus. <sup>42</sup>Jesus ha mirau sin el e detg: Ti eis Simon, il fegl da Gion, ti dueis ver num Chefas – quei vul dir il grep.